

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- मुख्यमंत्री उमर अब्दुल्ला कल नमीं दिल्ली च केन्द्री खजाना मंत्री निर्मला सीतारमण होरें गी मिले, प्रदेश लेई बाद्दू केन्द्री माली सहायता लेई आग्रह कीता।
- विज्ञान ते टेकनालोजी मंत्री डॉ. जितेन्द्र सिंह होर अज्ज श्रीनगर च सीएसआईपी दे सेहत दिक्खभाल सरबंधी सम्मेलन दा उद्घाटन करगन।
- उपराज्यपाल मनोज सिन्हा होर अज्ज झिड़ी मेले दी औपचारिक तौरा पर शुरूआत करगन। डिवीजनल कमीशनर रमेश कुमार होरें कलम'ले दिएं तैआरिएं दा जायजा लैता।
- मुख्य सचिव अटल डुल्लू होरें प्रधानमंत्री सूर्य घर मुफ्त बिजली योजना दे लक्ष्य गी हासल करने लेई जतनें गी तेज करने दा आह्वान कीता।

Chief Minister

मुख्यमंत्री उमर अब्दुल्ला होर कल नमीं दिल्ली च केन्द्री खजाना ते बपारिक मामले दिएं मंत्री निर्मला सीतारमण होरें गी मिले ते जम्मू कश्मीर मतल्लक माली मुद्दे पर गल्लबात कीती। मुख्यमंत्री होरें इस गल्ले दी सकारात्मक मेद बुज्झी ते केन्द्र सरकार कन्नै किट्ठे रलियै कीते जाने आले जतनें दी बदोलत जम्मू कश्मीर च माली स्थिरता ते टिकाऊ विकास गी बढ़ावा थ्होग। मुख्यमंत्री होरें खजाना मंत्री हुंदे अग्गे आग्रह कीता जे ओह जम्मू कश्मीर च सैलानी थाहरें दे बाद्दे विकास लेई लोड़चदे सुद्दे फंड उपलब्ध करान तां जे इत्थें सैलसफा दे हर क्षेत्र गी मयारी ते भलेया अज्जै कल्लै दिएं सुविधाएं सहूलतें कन्नै लैस कीता जाई सकै। मुख्यमंत्री होरें उनेंगी जम्मू कश्मीर दी कठन माली स्थिति दे बारे च बी अवगत कराया ते गुजारश कीती जे केन्द्र शासत प्रदेश दे 2024–25 ब'रे दे सलाना बजट च संसाधने दी बित्थ गी पुरने लेई 6 ज्हियार करोड़ रपे दी बाद्दू माली सहायता उपलब्ध कराई जा। पिछले किश दिनें थमां उमर अब्दुल्ला नमीं दिल्ली च न ते केई बड्डे लीडरें ते केन्द्र सरकार दे आला अधिकारिएं कन्नै मिलियै जम्मू कश्मीर दे महत्वपूर्ण मुद्दे पर गल्लबात करे करदे न।

<><><><><><>

Dr. Jatinder Singh

केन्द्री साईंस ते तकनीक मंत्री डॉ. जितेन्द्र सिंह होर अज्ज सीएसआईआर हैल्थ केयर थीम सेहत दी दिक्खभाल आस्तै सम्मेलन दा शुभारंभ शेर-ए-कश्मीर इंटरनेशनल कनवेंशन सेंटर श्रीनगर च करगंन। 16-17 नवम्बर 2024 गी चलने आले इस सम्मेलन दे शुभारंभ दा कार्यक्रम बडलै 11 बजे थमां दपैहरी 1 बजे तोड़ी चलोग। जम्मू कश्मीर सरकार च साईंस ते तकनीकी मंत्री सतीश शर्मा ते राई-बाई मंत्री जावेद अहमद डार इस कार्यक्रम च खास परौहने दे तौरा पर शिरकत करगंन। इस सम्मेलन दा आयोजन वन वीक वन थीम यानि इक हफ्ता इक विषय सार मुहिम तैहत् कीता जा'रदा ऐ। एहदा मुख्य मकसद नमैंपन गी उजागर करना ते सेहत संभाल दे क्षेत्र च बेहतर नतीजे आस्तै कोशश गी जारी रखना ऐ। 36 स्टार्टअप ते 8 सीएसआईआर संस्थाने हर्बल फूड यप्लीमेंट्स, कैंसर ते महिला सेहत आस्तै खास खास पद्धार्थ, बायो किटनाशक जनेह् क्षेत्रे च अपनी नवीनता, तकनीक ते उत्पाद प्रदर्शत करगंन।

<><><><><><>

Jhiri Mela

डिवीजनल कमीशनर जम्मू रमेश कुमार होरें कल मशहूर झिड़ी मेले दा दौरा लाया ते श्रद्धालुएं आस्तै कीते गेदे बंदोबस्त दा निरीक्षण कीता। बाबा जित्तो मंदर पुज्जियै रमेश कुमार होरें मत्था टेकेआ ते मेले च आयोजित छिंज दा उद्घाटन कीता। इस मौके सा सफाई, बिजली, पानी दी सप्लाई ते श्रद्धालुएं दी सहूलत आस्तै कीते गेदे दुए प्रबंधें दा बी जायजा लैता गेआ। डिवीजनल कमीशनर होरें तैनात अधिकारिएं गी निर्देश दित्ते जे ओह बेहतर सुविधा देने च कोई कसर नेई रखन तां जे जम्मू दे बाहरां आए दे यात्रु अपने कन्नै शैल अनुभव लेइयै जान। उपराज्यपाल मनोज सिन्हा होर औपचारिक तौर पर अज्ज झिड़ी मेले दा शुभारंभ करगंन।

<><><><><><>

Dy. CM

उपमुख्यमंत्री सुरिन्दर कुमार चौधरी होरें कल आखेआ जे खेड्डें दी गतिविधिएं च मता इजाफा होग की जे खेड्ड सरबंधी आधारभूत सुविधा विश्व स्तर दे मकाबले विकसित कीतियां जांगन जेहदे कन्नै अंतर्राष्ट्री मकाबले आस्तै खडारी तैआर कीते जांगन। चौधरी होरें एह गल्ल जम्मू दे के.के.हक्कू स्टेडियम च जम्मू कश्मीर च पैहली बारी होआ'रदी मास्टर गेम्स मल्टी स्पोर्ट्स इवेंट दा शुभारंभ करने मगरा अपने संबोधन च आक्खी। उपमुख्यमंत्री होरें आखेआ जे खेड्डें ते शारिक विकास आस्तै जमीनी स्तर पर मजबूत कोशशां कीतियां जांगन।

उनें आखेआ जे जम्मू कश्मीर च खडारिएं आस्तै विश्व स्तर दी सहूलत ते ढांचा स्थापत करने आस्तै सरकार वचनबद्ध ऐ। उनें जोड़ेआ जे खेड्ड छड़ा शरीर दा विकास गै नेई करदा सगुआं अनुशासन ते इक जुट्टता जनेह जरूरी संस्कार गी विकसित करदे न।

<><><><><><>

Sakeena Masood

सेहत ते मैडिकल शिक्षा , समाज कल्याण ते शिक्षा मंत्री सकीना मसूद होरें कल सिविल सचिवालय च लग्गी दी इक उच्ची सतह दी बैठक च जम्मू कश्मीर दिएं बक्ख-बक्ख यूनिवर्सिटिएं दी कारकरदगी दा व्यापक जायजा लैता। उनें यूनिवर्सिटिएं गी जोर देइयै आखेआ जे शिक्षा दे वैश्विक सतह दे मानकें गी हासल करने लेई शिक्षा दे मयार ते शोध च सुधार आंदा जा। उनें सब्बने वायस चांसलरें गी जोर देइयै आखेआ जे ओ पाठयक्रम च बेह्तरी आहन्ने, शिक्षा बवस्था गी मता असरदार बनाने बक्खी चेचा ध्यान देन। मंत्री होरें सब्बने वायस चांसलरें गी जोर देइयै आखेआ जे ओह अपनी अपनी सूनिवर्सिटी च जारी परियोजनाएं गी मित्थे गेदे समें सिर तोड़ चाढ़ना जकीनी बनाने पर ध्यान देन तां जे विद्यार्थिएं गी इंदा पूरा पूरा लाह हासल होई सकै।

<><><><><><>

Satish Sharma

खाद्य, परिवहन, युवा मामले ते खेड्ड मंत्री सतीश शर्मा होरें छम्ब निर्वाचन क्षेत्र दा तफसीली दौरा लाया। मंत्री होरें नीली नाला, चौधरवाला, बट्टल, जोगवान, बरछोह, ठंगर, कचरीयाल थाहरें पर लाइयै केइं परियोजनाएं दी निरीक्षण कीता, प्रतिनिधिमंडलें कन्नै मलाटी कीतर ते 3 द्यूबवेलें दा ड्रिलिंग दा कम्म शुरु करोआया। मकामी लोकें मंत्री हुंदे सामने शिड़कें, स्कूलें च स्टाफ दी कमी, हैल्थ सेंटरें च डाक्टरें दी गिनतरी बधाने जनेह मुद्दें रखे। मंत्री होरें लोकें गी भरोसा दोआया जे उंदे मसलें दे नबेड़े आस्तै सरबंघत विभागें कन्नै गल्लबात कीती जाग। मंत्री होरें जोगवान, बट्टल ते कलाह च 3 द्यूबवेलें दा ड्रिलिंग दा कम्म शुरू करोआया ते आखेआ जे एह्दे कन्नै पानी दी सप्लाई च सुधार होग ते पानी दी किल्लत दी समस्या बी हल होई जाग।

<><><><><><>

Chief Secretary

पीएम सूर्य घर मुफ्त बिजली योजना पीएमएसजी-एमबीवाई गी लागू करने च हासल उपलब्धिएं दा जायजा लैने आस्तै मुख सचिव अटलु डुल्लू होरें इक बैठक दी अध्यक्षता कीती ते बिजली विभाग दी बंड सप्लाई सरबन्धी कंपनिएं गी लोकें गी जागरूक करने ते उंदे तोड़ी पुज्ज बनाने आस्तै आखेआ तां जे केन्द्र आस्सेआ आयोजित इक स्कीम दे तैहत् लक्ष्येंग ी हासल कीता जाई सकै। विभाग गी आखेआ गेआ जे ओह बक्ख-बक्ख मीडिया प्लैटफॉर्म दा इस्तेमाल करियै एसएमएस राएं बी लोकें तोड़ी म्हीने म्हीने बिजली दे बिल पजान। एमडी जेपीडीसीएल वौधरी यासीन होरें जानकारी दित्ती जे डिसकॉम दी वैबसाईट उप्पर ज्हारें लोकें पंजीकरण करोआया ऐ। अजें तोड़ी 350 उपभोक्ताएं गी डीबीटी राएं पूरी यूटी च रियायत हासल होई ऐ। इस स्कीम तैहत् 85 ज्हार 8 सौ रपे दी सब्सिडी 3 किलो वाट पॉवर दे एसआरटी पर दित्ती जा'रदी ऐ।

<><><><><><>

Goa Film Festival

सूचना ते प्रसारण मंत्रालय राष्ट्रीय फिल्म विकास निगम ते गोवा दी मनोरंजन सोसायटी दे सहयोग कन्नै भारत दे 55में अंतरराष्ट्रीय फिल्मोत्सव दा सरिस्ता करने लेई पूरी चाल्ली तैयार ऐ जेहड़ा 20 कोला 28 नवंबर 2024 तगर पणजी च लग्गोग। आकाशवाणी दे जम्मू संवाददाता नै जानकारी दित्ती ऐ जे फिल्मोत्सव दा इस ब'रे दा थीम ऐ "युवा फिल्म निर्माता-भविष्य इयै ऐ" ते इस्सै मंशा कन्नै इक पुरस्कार भारतीय फीचर फिल्में च डेब्यू यानि पैहली फिल्म करने आले निदेशक लेई रक्खेआ गेआ ऐ जेदे नै नमें युवा फिल्म निर्माताएं गी बढ़ावा थ्होग। इस सम्मान च प्रमाण पत्र दे अलावा 5 लक्ख रपे दा नकद ईनाम बी दित्ता जाग। इस फिल्मोत्सव दे दौरान 81 मुखें दियां 180 फिल्मां दस्सियां जाडन। भारतीय फिल्म निर्माता आशुतोष गोवारिकर अंतरराष्ट्रीय न्याय मंडल दे अध्यक्ष होडन। इस फिल्मोत्सव च भारत दिएं चार महान हस्तिएं दे 100मीं बरे गंड दे मौके पर उनेंगी चेता कीता जाग जिंदे च महान फिल्मनिर्माता निदेशक ते अदाकार राज कपूर, फिल्म निर्माता तपन सिन्हा, तेलुगु फिल्म स्टार एक्कीनेकी नागेश्वर राव ते गायक मोहम्मद रफी शामिल न।

<><><><><><>

Nasha Mukht Ramban

नशा मुक्त भारत अभियान तैहत् शीर्ष स्वयं सेविएं लेई व्यापक सिखलाई कार्यक्रम कामयाबी कन्नै आयोजित कीता गेआ। एहदा सरिस्ता जम्मू कश्मीर प्रदेश कनूनी सेवा प्राधिकरण आस्सेआ समाजी न्याह ते सशक्तिकरण मंत्रालय दे बैनर हेठ कीता गेआ।

इस पैहल दा मकसद समाज गी नशाखोरी कोला भलेया मुक्त बनाने लेई जिला प्रशासन दे जतनें गी मजबूती देना ऐं प्राधिकरण थमां आई दी माहिर पल्लवी नै सिखलाई कार्यक्रम च हिस्सा लै'करदे स्वयं सेविणं गी जमीनी सतह पर नशाखोरीयां रोक लाने दे तौर तरीकें, नीतिणं ते दखल देने दे कम्में दे बारे च तफसील कन्नै दस्सेआ।

<><><><><><><>

Principal Secretary

मैहकमा राई—बाई प्रधान सचिव शैलेन्द्र कुमार होरें कल जम्मू प्रांतै च पशु ते भिड्डा पालन मैहकमे दी कारकरदगी दा जायजा लैने लेई इक बैठक लाई। पशु पालन निदेशालय तलाब तिल्लो जम्मू चलग्गी दी इस महत्वपूर्ण बैठक च उनें दौनें मैहकमे दिणं बक्ख—बक्ख स्कीमें ते कार्यक्रमें दी अमलावरी प्रगति ते उपलब्धिणं दी समीक्षा कीती। जिंदे च राई—बाई क्षेत्र दे पूरे पराते विकास सरबंधी एचएडीपी कार्यक्रमें, राष्ट्रीय गोकुल मिशन, राष्ट्रीय पशुधन मिशन, पशुणं दिणं बमारिणं दी रोकथाम लेइ राज्य गी दित्ती जाने आली सहायता, गश्ती वैटनरी इकाइयां ते होरने सुविधाणं, कार्यक्रमें ते स्कीमें बारे पूरी जानकारी शामिल ऐ। प्रधान सचिव होरें सब्बने स्कीमें दा पूरा पूरा लाह करसानें, पशुपालके ते भिड्डपालकें तगर पुज्जना जकीनी बनाने लेई संजीदगी कन्नै कम्म करने पर जोर दित्ता।

<><><><><><><>